

Mayan caso di homber cu a tira muher na cabez den Divi Divi Hotel den corte

ORANJESTAD(AAN) -- Mayan Corte di Promer Instancia lo trata e caso penal contra e homber Nelson Ras, kende dia 30 di September a tira un empleada di Dividivi Hotel, Anki Thode, na su cabez.

E lamentable incidente aki a socede mas o menos 4.45 or di atardi ora cu Anki Thode tabata cumpliendo cu su trabao esta atendiendo e turistanan di Dividivi Hotel banda di e bar.

Aparentemente pa motibo di problema amoroso, Ras a presenta na unda Thode ta traha y dilanti tur hende el a saca un revolver, mik y tira Thode na su cabez. E bala a alcanza Thode na su cabez cu consecuencia cu el a zak den otro y cay ariba suela. Tur hende cu tabata eynan a spanta mientras cu Ras a bira y cana bay.

Un turista paramedico cu pa casualidad tabata eynan e mo-

mento ey, inmediatamente a bay duna Anki Thode asistencia. Na hospital a keda constata cu e bala a drenta parti patras di cabez y a keda pega den e weso di cara di e victima.

E mester a worde opera inmediatamente caminda a logra saca e bala. Mientrastanto Polis den un forma relampago a logra detene Ras ariba e lugar di stacionamento di hospital

caminda a confisca e revolver cu a resulta di ta uno di Caliber 38.

Ta asina cu Ras a yega di maltrata Thode anteriormente dilanti otro trahadornan na hotel. Hasta ta asina cu Ras ta riba "black list" di e hotel ya cu Food and Beverage tabatin problema cune caminda hasta golpi a cay.

Mayan 11.45 or di mainta Corte lo trata e caso aki

caminda por spera cu Fiscal lo bay acusa Ras di intento di asesinato y lo exige un castigo severo. Ademas di e intento di asesinato Ras a haci su mes culpabel di posesion ilegal di un arma di fuego cual ta un delito hopi serio.

Redactor di DIARIO lo bay cubri tratamento di e caso aki y den nos edicion di Diasabra DIARIO lo bin cu un relato amplio di e caso aki.

Minister Glenbert Croes lo haya e raport

AWE MAINTA TA DIVULGA

RAPORT DI DESASTRE AVIA AIR

ORANJESTAD(AAN) -- Manera DIARIO a publica, e raport encuanto e accidente aereo di Avia Air ta cla y cu awe e comision special di investigacion lo entrega esaki na Minister Glenbert Croes.

Aña pasa 30 di September, 1 y 2 di October e comision encabeza pa mr. van Ginkel a interroga algun persona. Famianan di e victimanan di e accidente aereo di 13 di Maart 1996 tabata presente.

Mr. van Ginkel a participa na prensa cu asina cu e raport keda cla, lo duna esaki publicidad. E intension di e raport no ta pa punta dede riba ningun hende sino simplemente pa señala kico realmente a pasa y pa tuma medidanan pa evita cu den futuro algo asina lo bolbe ripiti.

Señora a pone "Spion" na careda

ORANJESTAD (AAN): Den oranan laat di anochi, habitante di Boegoeroei a pidi asistencia Policial. E señora a bisa Polis, cu el a nota un homber na un distancia, kende pa basta rato ta vigila su cas.

Na momento cu e homber sospechoso a nota cu e tambe ta worde vigila, el a dicidi di baha bay y desaparece den scuridat.

Polis a tira un vista den e bario menciona, pero no a topa cu e persona sospechoso, cual tabata actua manera "Spion".

Dos kilo di droga confisca na Aerocargo

ORANJESTAD (AAN): Autoridad a bolbe confisca mas di 2 kilo di droga. E caso aki ta bao di investigacion profundo.

Segun fuentenan, cu na Aerocargo lo a descubri un cargamento cu tabata na punto pa worde transporta pa exterior. Durante control rutinario a descubri un cantidad di droga empaketa.

E cargamento aki a worde confisca y segun informe e posibilidad grandi ta existi cu lo por bay pone man riba esnan responsable cu lo a entrega e paquete.

Manera ta conoci cu den tur forma traficantenan ta trata di exporta droga. Pero autoridad e ultimo lunanan aki ta riba un alerta constantemente, tanto locual ta drenta sali na

aeropuerto y waf.

Algun dia pasa un tripulante a baha tera y gracias pa douane atento a logra di pare na porta pa evita e por a yega mas leu cu esaki. E sospechoso Colombiano tabata tin varios kilo den su poder y el a trata di bandona tereno di waf cu esaki. Pero na salida el a worde para y gara cu e droga.

ONE COOL PAGAMENTO!!

